

29898

29

掌銓題稿

卷二十三之二十四
談論憲臣



掌銓題藁目錄

卷之二十三

覆御史尙德恒論總督王之誥疏

覆給事中戴鳳翔論巡撫海瑞疏

覆給事中王楨論尙書孫植等疏

覆給事中光懋論巡撫海瑞疏

覆御史成守節等論巡撫海瑞疏

覆都給事中溫純論總督劉燾疏

覆給事中張崇倫論都御史李邦珍等疏

覆宣大巡按姚繼可論巡撫方逢時等疏

覆都給事中韓楫等論侍郎游居敬等疏

覆遼東巡按向程論巡撫毛綱疏

覆御史郅永春總督王崇古互相論訐疏

覆給事中張國彥論侍郎姜廷頤疏

覆御史馬三樂論太常卿陳慶疏

覆給事中程文論孫丕揚等疏

覆科道官論漕運都御史陳烱疏

覆御史吳道明論應天巡撫陳道基疏

覆福建巡按杜化中論侍郎谷中虛等疏

覆給事中涂夢桂論侍郎谷中虛疏

覆給事中周良臣等論卿楊賢等疏

覆都給事中梁問孟追論貴州事疏

覆吏科論巡撫曹三暘疏

覆御史姚光洋論府丞丘有崑等疏

掌銓題藁卷之二十三

覆御史尙德恒論總督王之誥疏

該巡視京營河南道監察御史尙德恒題
稱協理京營戎政兵部左侍郎王之誥蒙
皇上俯宥前愆特加起用委以戎政此正罄竭
衷赤以圖立功之日乃於會推三邊總督
之缺安意承之夫會推之事主之以九卿
科道臣非不知非誥所得而專也但以會
推所及誥豈不與聞苟於營務而素肯擔

當銳意振作將必卽爲說辭乘此集議分
練之時以爲振起積衰之舉乃緘默而安
受當事而任事者固如是乎則其所以設
心積慮希脫戎任者已非一日矣於此時
而推外營謀規避之計昭然可見伏望收
回

成命

勅下該部毅然究斥等因又該右都御史王之
誥奏稱自揣不堪重任懇乞

聖明亟賜罷斥以謝人言等因俱奉

聖旨吏部知道欽此欽遵通抄出送司查得隆
慶四年正月內爲缺官事該本部等衙門
會題奉

聖旨王之誥陞都察院右都御史兼兵部左侍
郎總督陝西三邊軍務寫勅與他欽此今該
前因案呈到部爲照三邊總督內綜八郡
外控諸夷統轄遼遠則防禦難周調度用
功則顯罰立至且沙漠寒苦何等艱辛較

之協理京營循規而徐理之者安危難易
迥然不同先該總督員缺廷臣從公會推
本官堪以經畧已蒙

聖明簡用今御史尙德恒正當會議之時有此
論列而都御史王之誥遂具疏辭免臣等
看得王之誥久歷邊疆才猷明練就難舍
易乃公論之所推棄安卽危豈人情之所
願論劾實出意度旣莫可憑辭免雖極懇
誠亦難遽允况宣大西北門戶尤爲緊要
方今正屬春防新調總督王崇古尙在二
邊候代本官赴任更不容緩合候

命下行令本官遵照

前旨作速前去交代供職不得再行陳乞有誤
大計但京堂二品官員去留出自

朝廷臣等未敢定擬等因隆慶四年二月十
三日題十五日奉

聖旨是王之誥着遵前旨上緊赴任交代毋得

再辭

覆給事中戴鳳翔論巡撫海瑞疏

該吏科給事中戴鳳翔題稱巡撫應天右
僉都御史海瑞謬戾傲妄日甚一日若不
早爲議處恐或釀成大患輒掇見聞冒昧
塵

瀆一濫受詞訟在

皇上亦洞悉民姦

頒行重禁也瑞則不顧

赦前事件悉聽告訐又無放告日期旋出旅進

動盈千紙累涉萬人不能按理曲直以剖

是非而但徇情愛憎以決勝負致使刁徒

弗安生理惟思構訟以小過而飾成極惡

以虛誕而捏作實情本以戶婚田土裝爲

人命強盜或未告而揚言以需索或旣告

而講價以求和越訴者不答誣告者不杖

律法掃地羅織成風人心至此其大壞矣

一田產分贖在

祖宗亦慮紊事端定限五年也瑞則不拘遠年

交易違例開斷又不詳審干證隨告隨給
真偽不分情理俱拂或以明中正契而作
無交或以彼此情願而作逼獻致使棍徒
不營活計專謀奪產重墾更新者徑以舊
價回贖已業蕩盡者又於祖產再分或稱
投靠以嚇其白還或云占匿以肆其奪取
剗吐民之肉啖餓虎之喙風俗至此其極
敝矣一民兵爲防禦所資冗糧因所當裁
而正兵亦不可散况兵有已散之名而糧
無已裁之實爲之瑞者欲欺

君乎欲欺天平瑞到任時槩將各兵題

請散歸兵糧盡行蠲免民無長慮侈爲美談殊
不知此輩携家寄住旣同土著雖欲自去
亦無所歸聞報之日攘臂奮呼排入都院
若非湯兵備權宜救解幾成激變之禍畢
竟莫可誰何遂那民壯工食與之數旣不
敷又復加派不能熟思審處於前却乃朝
四暮三於後且軍餉銀兩曩於十一府津

貼度幾衆輕易舉今聞

題免各府已置不理矣偏累之苦其何能堪夫
散兵者正以節糧也客兵旣云散訖而兵
糧仍派如故卽今孟河大澤之間嘯聚者
不下數千密謀連結倭寇攻陷城池誓血
爲盟私相立號邀截商貨白晝殺人劫庫
斬關目爲兒戲以故行旅不通煙火斷絕
衆心詢詢莫不思亂臣恐潢池之變起在
旦夕非東南細故也一道路爲公差所經
冒濫固所當際正支亦不可革况所省者
小而所費者大爲之瑞者欲利民乎欲利
國乎瑞出京時用夫三十餘名德州而下用
夫一百餘名彼且自爲分所應得殊不知
以此而處已亦當以此而處人卽如建德
一縣舊爲南北通衢假令就彼酌量不使
其中破冑則旣能節屬邑之財又不貽鄰
境之累夫何不可今乃不爲此塞彼通之
思遽爲顧此失彼之計槩將建德夫馬盡

行革罷然建德之路雖不可通而公差之
行實不容已只得取道於星子等縣迂枉
四百餘里繞路既遠支應反多是省一縣
之財而費數縣之力名雖愛民實則蠹
國况昨年差祭海神假稱

勅訪民事恐嚇當路邀獵趨承直至本鄉雖柴
燭之微亦取足有司之供送擗轎徑入二
司中道致害夫皂俱被拿責三十尙不愧
悟動以聖人自居觀其條約中有大聖人
作爲等語而狀有欺天玩聖字樣不論虛
實悉此准行臣恐聖人之名僭竊太甚非
海瑞所宜也一江南之俗以田爲業產戶
置其田則供稅佃戶耕其田則輸租佃戶
之輸租猶產戶之供稅是稅之出於租亦
明矣就中廣嚴多取之禁可也瑞乃不諳
民俗妄禁不許完租夫租旣不完稅從何
出此言一倡府縣遵之致使佃戶結賴其
租產戶空賠其稅異日必以富庶爲禍階

以貧賤爲樂境智愚同阡流亡膏腴盡爲
荒廢

國家財賦何所出辦哉一江南之民其財易
耗耕蠶之本匪借不給公私之用匪借不
周故或資以贍口食或資以足錢糧是借
貸之相濟亦久矣就中嚴抑取利之禁可
也瑞乃不遵

明例妄禁不許還債夫債不還於今則借不通
於後一方如此他方效之致使食用雖急
稱貸無門異日必以求爲自逞不以安土
爲樂強暴則刼掠苟生柔軟則束手待斃
生靈危困何以自蘇哉李同知陞南京戶
部例當辭也駕言忿其私謁縱令皂隸訪
察乘坐何舡竟被索詐二十金而隱蔽王
司業以伊親牽涉事甚微也作意侮其京
秩票差皂隸請來相見恣被索詐三十金
而放免外班皂隸說事少者四五十金多
者直置百金方得安妥否則禍且立至其

謬戾傲妄大率類此他如錦繡叅謁以僭
居尊之分越境拿人以取打船之辱信用
門吏以張牙爪之威狎慢公卿以鑠士夫
之氣臣固未暇枚舉然此猶其所轄之事
耳臣又訪其在南京時妻妾相爭閨門失
德偏向寵妾毆詈正妻其妻憤激自縊身
死妾亦荒懼相繼而縊一日致死二命恬
不爲意此其心之殘刻且忍於其妻妾矣
焉能不忍於子民乎如是而欲其盡拊循
之道以貽地方之安臣知其必不能也伏
聖

勅下閣部大臣查訪臣言從長議處毋惜一人
以養莫大之憂勿泥一事以槩終身之行
將海瑞改授清銜以示優禮或加授重秩
令其致仕等因題奉

聖旨吏部知道欽此欽遵看得都御史海瑞自
撫應天以來裁省浮費釐革宿弊振肅吏
治矯正靡習似有惓惓爲

國爲民之意但其求治過急更張太驟人情不無少拂旣經言官論劾前因若令仍舊視事恐難展布相應議處合候

命下將本官遇有兩京相應員缺酌量推用遺下員缺先行會官推補但撫臣去留出自

朝廷臣等未敢定擬隆慶四年二月十五日

題十七日奉

聖旨是

覆給事中王禎論尙書孫植等疏

該南京吏科給事中王禎題稱魏國公徐

鵬舉溺愛徇私冒違典禮寵妾鄭氏假作

夫人冒請

誥封棄長子徐邦瑞而立幼子徐邦寧朦朧並

送入監誠意伯劉世延意圖邦寧家積之

富期結姻親密爲畫議干請監中駁查復

邀四府共結南京國子監祭酒姜寶於鷺

峯寺受金玉寶珠首飾之獻遂行文駁查

以致二子互爭橫議百出釀成徐氏家門

之禍南京刑部尙書孫植幸奇貨之可居
貪澳利之屢獲鵬舉叩門囑託延坐三鼓
而別重賄潛通於私室事情遷就於公移
乞

勅該部查議將徐鵬舉劉世延姜寶孫植亟賜
罷斥以爲大臣邪鄙不忠之戒仍行禮部
將鄭氏受封情由嚴行查勘將先年頒給
誥命卽行追奪等因奉

聖旨該部知道欽此欽遵查得隆慶四年正月
內該南京刑部尙書孫植等題爲乞查問
未明事情以申飭監務事該本部議覆將
鄭氏原得魏國公夫人

誥命一軸亦當追奪等因節奉

聖旨鄭氏誥命着追奪欽此今該前因案呈到
部除魏國公徐鵬舉誠意伯劉世延移咨
兵部議覆及鄭氏

誥命已奉

欽依追奪無容別議外爲照刑曹乃綱紀之司

必守正不撓而後可以明法祭酒爲師儒
之長必行已無玷而後可以教人所據南
京刑部尙書孫植南京國子監祭酒姜寶
被論事情如果是實誠爲上汗

清朝下拂公議卽當顯行罷斥但事在彼中難
以遥度相應議擬合候

命下將孫植姜寶一面行令回籍聽勘一面將
所劾事情移咨南京都察院嚴提李秀等
一千人證到官從公體勘明白具奏呈日
另行議

請遺下員缺先行會官推補等因隆慶四年二
月初一日題初三日奉

聖旨是孫植姜寶着回籍聽勘

覆都給事中光懋論巡撫海瑞疏

該吏科都給事中光懋等題參應天巡撫
海瑞悻悻自好皎皎自明假以自陳橫泄
胷憶且反中言官醜詆孟浪無所執據事
屬乖違法應參究參照原任應天巡撫右

僉都御史海瑞小器易盈晚節不竟憤世
嫉俗詎能體悉乎人情市直矜名豈知卒
流於私意致言官之論列宜悔志以改圖
方且尙氣凌人大逞心迹之辯誣善敗類
連及臺省之臣

朝廷之體統甚乖平生之忠義何在乞

勅下該部降級調用以示劓懲如惜其舊日名
節姑移咨譴責省令改悞等因奉

聖旨吏部知道欽此欽遵看得都御史海瑞巡
撫應天更張太驟頗拂人情先該科臣戴
鳳翔論列已蒙

聖明處分本官引咎自陳亦所宜然却乃憤激
不平詞涉攻擊委的有傷大體今經叅劾
夫復何詞但本官孤忠自許直氣不撓舊
日名節委有可惜一時憤激乃其氣稟學
問之疵揆之官常原無敗損况已奉有

欽依無容別議合候

命下臣等行令本官照舊候用遇有員缺推補

仍令其責躬省過平氣虛心正直而濟以
中和剛方而文以禮樂務擴包荒之度毋
徇意見之偏則將來建立必有勝於今日
者固不止爲一節之士矣伏乞

聖裁等因隆慶四年四月十三日題十五日奉
聖旨是

覆御史成守節等論巡撫海瑞疏

該河南等道監察御史成守節等題稱臣
等伏覩邸報見巡撫應天右僉都御史海
瑞奏爲衰病不能供職懇恩曲賜歸田以
延殘喘事中間首張誇大之詞終侮舉
朝士人以洩快快不平之氣乞嚴加

戒諭務使虛已有容以圖後效改過不吝以蓋
前愆等因奉

聖旨吏部知道欽此欽遵看得都御史海瑞先
次奏辯已該臣等覆奉

欽依行令省悟今乃詞稱請歸意甚快憤且固
執偏見是已非人殊失大臣之體御史官

見其輕躁連名糾劾誠非過舉但本官已
奉

欽依照舊候用無容別議合候

命下行令遵照前奉

欽依內事理循省前愆圖報

隆恩不得任情乖張有負初志等因隆慶四年

四月二十三日題二十五日奉

聖旨是

覆都給事中溫純論總督劉燾疏

該兵科都給事中溫純題該原任兩廣總

督劉燾寓書於臣開函見有禮帖一通內

開金色段等物共代銀二十四兩通賄鑽

刺乞

勅吏部將劉燾或據平生斥奪其官或念秋防

在邇據此一節重加降罰以杜私交等因

奉

聖旨吏部知道欽此欽遵查得隆慶四年五月

內爲營務初更條陳未盡事宜以飭戎政

以裨安攘事該本部等衙門會題節奉
聖旨劉燾着以原職提督神樞營寫勅與他欽
此今該前因通查案呈到部看得原任總
督劉燾敵愾垂二十年苦辛

王事馳驅殆數萬里捍禦邊疆今意氣尙雄
年齡未邁况在多事之日本非可棄之人
但其餽送無名指摘有據通東書於白書
雖非苞苴之爲加卑禮於言官乃是脂韋
之行欲擬留用則該科既有論列何以使
之自安欲擬左遷則大臣乃帶瑕疵何以
令其自展合候

命下將劉燾令其致仕員缺另行會官推補但
大臣去留出自

朝廷臣等不敢定擬等因隆慶四年七月十
九日題二十一日奉

聖旨劉燾着致仕

覆給事中張崇倫論都御史李邦珍等

疏

該南京禮科給事中張崇倫奏稱提督操江都御史李邦珍本非通才偶叨重任一聞邊警皇遽失措且交結

王府營營百計所當罷斥保定巡撫李尙智稍飾清謹之虛稱實罕才賢之善狀百事盡荒一籌莫展所當致仕等因奉

聖旨吏部知道欽此欽遵看得李邦珍行履既招訾議李尙智政務既有廢弛本應議罷但皆年力未衰似難盡棄既該給事中張崇倫叅論前來相應酌擬合候

命下將各官調別衙門用行令回籍聽候各員缺照例會官推補但大臣去留出自

朝廷非臣等所敢定擬等因隆慶四年十一月初二日題初四日奉

聖旨是李邦珍李尙智着回籍聽調

掌銓題稿卷之二十三終

掌銓題藁卷之二十四

覆宣大巡按姚繼可論巡撫方逢時等

疏

該巡按直隸監察御史姚繼可題稱隆慶

四年十月初一日

賊二萬餘騎自平

地方入境殺

人畜巡撫大同方逢時登

城見賊勢逼近鎮城乃慌忙無計謀出下

策隨差旗牌龔喜通事土忽智直入

營

見黃台吉說稱我太師叫這邊差一人去

城上荅話黃■差賊帖木舍來見逢時引
至城樓頂上密行譯審犒賞送回又授謀
者指以侵犯宣府地方黃■果起營侵犯
洪州一帶其各該鎮巡將領等官有臨敵
而僥倖苟免者有畏敵而觀望不進者事
跡昭然通應併究乞將平■叅將劉廷玉
侯賊退事定之日究問大同總兵官馬芳
行令戴罪殺賊巡撫方逢時亟行罷斥總
督王崇古免究仍行

戒諭逐賊出境以靖地方等因奉

聖旨吏兵二部知道欽此欽遵除馬芳劉廷玉

等該兵部議覆王崇古免究俱無容再議

外爲昭方逢時年力精強才猷敏練邊防

允賴輿論共推今指其致款曲於■營非

有證據之實嫁禍患於宣鎮亦無知見之

人况■執叛乞降之時正撫臣臨機設

策之日■情旣不可盡洩秘計亦難以自

明但當要其後效何如耳果於事無成自

難追其罪如於

國有益自難掩其功今事未就而預責之何以能得其情若謀未諧而輒易之又孰爲善其後合候

命下行令方逢時照舊安心供職務要協贊總督奮勵將士期收五利共圖萬全固不可偏泥已見有疎未然之防亦不可惑沮人言坐失垂成之績通待事完奏

請取自

上裁庶人心不搖邊事有濟等因隆慶四年十一月二十二日題二十五日奉

聖旨是方逢時着照舊供職

覆都給事中韓楫等論侍郎游居敬等

疏

該吏科都給事中韓楫等論劾刑部右侍郎游居敬順天府府尹姚一元各年老應天府府尹周倣原任操江右僉都御史今調雲南副使吳時來各不職乞要將游居

敬姚一元勒令致仕周俶吳時來速爲罷
斥等因奉

聖旨吏部知道欽此欽遵爲照游居敬姚一元
年力已邁就列爲難周俶吳時來曠廢已
久官箴且壞旣經該科叅劾前來相應依
擬合候

命下將游居敬姚一元俱令致仕回籍周俶吳
時來俱令冠帶閑住各員缺照例推補但
去留出自

朝廷非_臣等所敢定擬隆慶五年二月初十
日題十二日奉

聖旨是游居敬姚一元着致仕周俶吳時來冠
帶閑住

覆遼東巡按向程論巡撫毛綱疏

該巡按遼東監察御史向程論劾巡撫遼
東右僉都御史毛綱聞喪擅離地方乞要
比照顧應祥事例冠帶閑住等因奉

聖旨吏部知道欽此欽遵爲照巡撫非交代不

得擅離地方此乃

國家明例豈容故違今毛綱一聞父喪擅自
離任論法本難輕貸但其奔喪急遽似有
可憫之情且人材難得直擬罷職不無可
惜既經巡按御史叅論前來相應酌擬合
候

命下候本官服闋之日薄示降調以警將來隆
慶五年二月二十四日題二十六日奉

聖旨毛綱候服滿之日降一級調外任欽此

覆御史部永春總督王崇古互相論訐

疏

先該巡按山西監察御史部永春題稱督
理河東鹽政今已告完其中利病故再陳
之如吏部左侍郎張四維父張允齡乃運
司老商霸占鹽窩總督宣大兵部尙書王
崇古弟王崇教係運司大商囑託先支此
一二臣者類皆嗜利忘義阻公營私乞將張
四維亟賜罷斥王崇古如行罰治等因奉

聖旨該部知道欽此欽遵隨該王崇古奏稱御史部永春指劾臣事原無情實緣因永春冬月挑渠凍餒貧民臣行議止遂以抱恨又因考察舉劾臣查得運司副使丘瓚萎懦貪鄙所當劾黜及見永春肆意更張生事虐民故於叅論丘瓚詞語指其當塩法更張之會不能匡贊監司永春不思自任狂悖乃挾讐捏誣臣弟王崇教爲運司商人阻壞鹽法及訪得永春鼓舞愚民報中超掣嚼以後利又安邑縣知縣袁弘德以金銀首飾贓贖裝成皮箱六個饋送永春收受仍付弘德帶送原籍乞將永春論臣緣由及臣奏內事情行接管巡鹽御史會同山西撫按衙門查勘心迹自明等因又該戶科都給事中宋良佐等題稱接到河東巡鹽御史部永春直陳鹽法疏內叅總督王崇古霸占鹽窩王崇古奏辯疏內又稱永春因公挾私叅詳事情原無大故只

因私憤遂至互訐致傷

國體乞量加戒諭等因俱奉

聖旨吏部知道欽此欽遵通抄送司案呈到部
看得巡按山西監察御史邵永春參稱本
部左侍郎張四維總督宣大兵部尙書王
崇古各阻壞鹽法乞要罷斥罰治隨該王
崇古奏辯前項事情毫無相干及稱邵永
春因公挾私欺

君虐民要將被劾緣由勘處又該戶科都給
事中宋良佐等參論總督王崇古御史邵
永春因憤互訐亦要量加懲飭各一節除
張四維近已二次自陳俱奉

明旨處分照舊供職無容別議外爲照爲臣當
以公爲心而不可奪于私論事當以理爲
主而不可動于氣今御史邵永春本爲崇
古論運副丘瓚中有監司更張數語嫌於
指已遂劾以阻壞鹽法蓋激而動氣者也
使崇古無丘瓚之說則永春必無此奏可

知矣尚書王崇古又因永春之有前奏亦遂以賊過有跡劾之亦激而動氣者也使無永春之劾則崇古必無此奏又可知矣二臣既皆出於動氣有激而然則其所訐之詞何以爲據哉人臣不以

國家之務爲急而乃交口互攻求逞一己之憤實未見其可也都給事中宋良佐等直指本情叅奏欲加懲劄誠爲正論合候

命下本部移咨都察院戒諭御史部永春令其痛自省改一面移咨尚書王崇古當以邊務爲重一意經畫亦不得以人言動氣有失大臣之體如再有攻訐容臣等叅奏究治以後言官論事務要虛心平氣據事直陳不許懷忿妄奏其被論者只當聽候處分不許輒事辯訐若果係誣枉亦止許自明心迹不得指摘言官他事以圖報復庶私忿不行

朝政可肅等因隆慶五年四月二十一日題

二十三日奉

聖旨是

覆給事中張國彥論侍郎姜廷願疏

該禮科都給事中張國彥題稱南京兵部侍郎姜廷願給由到京照例引見觀其行禮致詞之際狀則僂僂聲則啞啞龍鍾衰老脂韋不堪

留都重地非養老之區軍政大權無備員之理乞令致仕等因又該姜廷願奏稱臣歷今官二年給由蒙

准復職給事中張國彥論臣衰老不堪委出真見臣之本心原欲乞休不意人言先發此心無以自明乞

賜罷斥以謝人言等因俱奉

聖旨吏部知道欽此欽遵通抄出送司案呈到部看得禮科都給事中張國彥論劾南京兵部右侍郎姜廷願衰老不職乞要責令致仕隨該本官自陳衰老乞要罷斥各一

節爲照本官入仕且三十載歷著風猷近
因患病失音精神衰謝

留都筦樞之地委非所宜旣經該科論劾前來
兼以本官乞休情詞懇切相應議處合候
命下行令本官以老疾例致仕員缺另行推補
等因隆慶五年六月十六日題十八日奉
聖旨是姜廷願着致仕

覆御史馬三樂論太常卿陳慶疏

該貴州道監察御史馬三樂題稱太常寺
卿陳慶形體羸弱步履艱難志氣昏庸難
與祀事乞照年老事例容令致仕等因奉

聖旨吏部知道欽此欽遵爲照陳慶歷任雖多
未聞善狀行年已邁徒有衰容當休矣而
不休欲用之而奚用旣經御史馬三樂論
列前來相應議處合候

命下行令本官致仕員缺另行推補等因隆慶
五年七月初一日題初三日奉

聖旨是陳慶着致仕

覆給事中程文論孫丕揚等疏

該禮科給事中程文題稱罷任蒲城縣知縣呂宗儒因治下鄉官王表屢以私干被宗儒叱辱致惹咬恨陷害從生時值奸貪御史今陞大理寺右寺丞孫丕揚養病在家遂將銀五百兩潛送丕揚受訖尋起進京約會該省巡按御史王君賞遊宴華山袖出揭帖轉遞君賞遂爾不察叅劾去官公論旣已昭彰醜行自難曲蔽若不嚴加懲治竊恐奸邪得計而貪肆橫惡愈無忌矣乞將孫丕揚依律處究等因奉

聖旨吏部知道欽此欽遵爲照行檢之污無如黷貨心術之險莫過害人今給事中程文旣稱孫丕揚黷貨害人咸有證據則其心術已壞行檢已虧卽宜罷斥但風憲官犯賊罪有不止於罷斥者必須勘明乃可盡法而服其心合候

命下將孫丕揚先行革職回籍本部一面移咨

都察院劄行彼處巡按御史將一千人犯
嚴提究問明白奏

請處分其遺下員缺照例推補等因隆慶五年
七月初四日題初六日奉

聖旨是孫丕揚着革職回籍聽勘

覆科道官論漕運都御史陳爌疏

該戶科都給事中宋良佐等巡按直隸監
察御史唐鍊各題叅漕運都御史陳爌調
度失策船糧漂損數多乞要重加罰治仍
責令整飭處補漂流船糧及經營新運以
圖後贖或令戴罪回籍聽勘另

簡心計大臣接管等因奉

聖旨吏部知道欽此欽遵除計處船糧等項事
宜及論總兵陳王謨罷斥聽戶兵二部議
覆外爲照

國家重計莫過漕糧陳爌職司總督無能催
饋預防以致糧艘漂折至百餘萬石怠悞
若此瘵曠何辭旣經科道官叅劾前來相

應議處合候

命下行令本官回籍聽勘俟查勘回日另行具
奏員缺即便會官推補隆慶五年十月初
九日題十一日奉

聖旨是陳炯着回籍聽勘欽此

覆御史吳道明論應天巡撫陳道基疏
該河南道監察御史吳道明論劾應天巡
撫右僉都御史陳道基奸貪不職乞要罷
黜等因奉

聖旨吏部知道欽此欽遵爲照陳道基職任撫
巡大招物議以致言官論劾本當罷斥但
事須覈實乃可處分合候

命下將陳道基被劾事情移咨都察院劄行彼
處巡按御史查勘明白具奏陳道基行令
回籍聽勘員缺即便會官推補隆慶五年
十月十七日題十九日奉

聖旨是陳道基着回籍聽勘欽此

覆福建巡按御史杜化中論侍郎谷中

虛等疏

該巡按福建監察御史杜化中題爲被劾
貪穢將領鑽刺部院大臣及司府勘問等
官致圖脫網懇乞

聖明嚴行並究以正法紀以昭公論事卷查隆
慶二年五月該巡按福建監察御史王宗
載題爲糾劾不職將官貪穢殘酷大失人
心乞

賜罷斥以肅軍政事內叅論原任分守福建南
路叅將王如龍侵尅兵糧并受總哨趙記
等銀共三千餘兩又受廣寇曾一本珠甲
一領雲鎖幅四疋女子二口及姦淫良婦
暴橫齊民又隆慶四年十二月該巡按福
建監察御史蒙詔題爲舉劾武職官員以
肅軍政事內叅論福建遊擊將軍署都指
揮僉事金科尅減

欽賞功銀并兵糧及詐騙商人把總銀共七千
餘兩妻浦城周鄉官之義女娶同安傅都

憲之美妾都司軍政僉書署都指揮僉事
朱珏侵削軍餉并索把總朱全德等銀共
五千餘兩又任性刑斃無辜恣志宣淫無
忌各不法等情該兵部覆奉

聖旨王如龍着革了任巡按御史提問金科朱
珏革了任行巡撫衙門提問俱經欽遵轉
行福建按察司勘問去後臣竊思之我

朝自開國至今已逾二百餘禩未有巡按御
史叅論之人而行巡撫衙門勘問者也反
覆圖維不得其故乃詳加查訪始知有因
蓋金科朱珏二犯既經論劾之後自度

王法不貸日夜惶懼莫知所出遂遣人携二千
金潛入

京師託總兵戚繼光賂於兵部左侍郎谷中
虛之門以求救解而吏書掾史則又皆有
數百金之遺維時中虛利其重寶經營布
置扶助主張覆奏行巡撫衙門問理以圖
解脫此中虛貪肆不檢污穢遺臭之罪所

當首論者也及

命下之日二犯得報喜曰巡撫何寬吾輩之故
舊鄉里也乃乘里閑攸同之便遺千金於
寬之家而於寬子金科又餽銀四百兩朱
珏三百兩絲布四十疋伊子復馳書於寬
寬乃對原任按察使熊琦曰金科朱珏二
良將也當召保在外勿爲監禁寬又時時
呼二犯出入公署與之談說無異父子二
犯復密邀寬之愛妾父母送入其宅以資
維持於是醜聲宣播暨入閩矣至問之日
不委之司亦不委之道乃令按察司轉委
運使李廷觀推官李一中聽理而金科朱
珏又初送廷觀五百金次二百金何寬默
爲指示曰此事問不必詳止具由了前件
而已於是李廷觀李一中一以受賄之故
一以逢迎之巧證佐未及提被害未經審
各從輕擬而新任按察使莫如善者又年
近七袞神昏氣耗聽其舞文弄法而二犯

與王如龍俱議從輕切思運使職掌鹺政
無與刑名之事而推官職分眇小焉稱受
理之責卽此一節則寬之納賄故縱形跡
昭然在人耳目乃金科朱珏又謀於王如
龍曰吾輩幸今倚籍何爺然根株尙存終
非善後之策復又先各捐千金送總兵戚
繼光接受遂爲代

奏行取赴

京聽用除王如龍臣仍牌行按察司再勘外
而三犯赴浙之日乃巡撫都御史何寬准
兵部咨內開王如龍金科朱珏先行福建
巡撫衙門就被督發速赴浙江通聽副將
胡守仁督同選兵完日各分投統領往邊
等因隨該巡撫何寬牌促該司起送去訖
但旣奉

欽依取用而臣輒羈之是與

君命抗也以故一面發行一面具

奏候有

明旨再問無遲也伏乞

皇上念貪饕恣睢之徒蠹政爲甚

勅下兵部別選將材將金科朱珏王如龍仍遞

回福建容

臣

嚴究如律庶鼠竊狼貪之輩

知有所警而海邦蒼生亦駸駸乎有更生

之望矣况三犯皆是炎方骸骸之夫豈能

稱紫塞干城之寄何戚繼光等敢於行私

而委曲庇護之至此耶此又臣之所未曉

也叅照總理練兵事務兼鎮守薊州等處

總兵官戚繼光官成而志已怠守壞而名

亦損納污含垢不恤公議之重臨財苟得

徒求私橐之盈言雖高於秋昊行實卑於

汚地兵部左侍郎谷中虛人本么麼行多

關茸空叨三品之榮止圖干倉之足結姦

黨而賣公法是誠何心受逋逃而匿犯人

罪復何辭塵垢日積洗雪無門原任巡撫

福建都察院右僉都御史今陞大理寺卿

何寬奸險萬狀詭詐百出溺情於桑梓寧

知傷乎憲體易心於金幣遂爾比乎匪人
外每抗臆於君子之林內實陰懷乎小人
之私四知弗畏一錢不直且學術素短事
體欠諳於巡海道外而

奏添團練一事何取於二人移武平守署於
邵武一舉輒費乎萬金怨徹骨髓訕徧閩
閩撫小邦已爲冒濫卿大理更覺羞辱福
建按察司按察使莫如善衰朽之齡愚闇
之質防範不嚴於吏胥惟憑指示斷案多
眩於曲直豈克明允守雖未壞才甚無取
福建都轉運鹽使司運使李廷觀心同溪
壑迹類穿窬出位而勘問乎有罪奉何明
典因事而大肆乎需索那惜名節箱篋已
盈洩忍孔彰福州府推官李一中賦性萎
齷臨事詭隨聽訟無剖決之能理刑多寬
抑之聲如林魁匿名告人律有明條也何
改擬乎徒罪莊鳳雛毆死蔡十三人所共
知也奚止問乎不應非直優柔不斷苟且

乎科珏之獄抑且受囑行私沸騰夫衆多之口伏乞

皇上勅下吏兵二部再加查訪如果臣言不謬將戚繼光嚴行戒諭谷中虛何寬李廷觀亟行罷斥莫如善依年老事例致仕推官

李一中

俯容降用庶

清朝無貪夫之玷法紀昭而公論協矣等因題奉

聖旨吏兵二部知道欽此欽遵抄出送司案呈到部除總兵等官戚繼光等兵部徑自查覆外爲照侍郎谷中虛都御史何寬俱係大臣若果受賄縱奸則是重干法紀豈容輕貸但事出風聞靡所證據未經勘實何以正法而服其心合無行令回籍聽勘待事明之日另行奏

請處分其按察使莫如善年力旣憊難更支持運使李廷觀操守大虧久騰物議推官李

一中刑多故縱道有寃聲御史杜化中俱
別有指劾與本部素訪相同不止勘問金
科等賣法一事相應議處合無將莫如善
照年老例致仕李廷觀照不謹例冠帶閑
住李一中照不及例起送赴部降用候

命下之日本部移咨都察院轉行福建撫按衙
門查照施行隆慶六年正月二十四日題
二十六日奉

聖旨是谷中虛何寬着回籍聽勘莫如善致仕
李廷觀冠帶閑住李一中降用欽此

覆給事中涂夢桂論侍郎谷中虛疏

該吏科給事中涂夢桂論劾兵部左侍郎
谷中虛奸貪不職乞要亟行罷斥仍將近
得

封廕另行議奪等因奉

聖旨吏部知道欽此欽遵爲照谷中虛先該巡
按御史杜化中論劾已經覆奉

欽依革任回籍聽勘今據給事中涂夢桂論其

兩任巡撫再貳本兵皆有貪聲賊私狼籍
似難再留其

封廕恩典已有

成命似宜姑免追奪通應議處合候
命下行令本官冠帶閑住原得

封廕俱免追奪隆慶六年二月初二日題初
四日奉

聖旨是谷中虛着冠帶閑住欽此

覆給事中周良臣等論卿楊賢等疏

該吏科給事中周良臣題稱太僕寺卿楊
賢年老昏庸不堪任事乞照年老事例勒
令致仕又該刑科左給事中梁問孟題稱

太僕寺卿楊賢精神昏倦年齒衰頹通政
司右叅議王汝言庸瑣特甚物議久播于
部司鄙猥不堪醜態尤昭于通政見其奏
事字語含糊此二臣者俱不堪京職乞將
楊賢依年老致仕王汝言調補外任等因
俱奉

聖旨吏部知道欽此欽遵爲照太僕寺卿楊賢
昔爲

王親之故久在淹遲今當分豁之年已成衰
暮雖官常之未壞實職任之難勝通政司
右叅議王汝言昔官郎署頗犯官箴今在
納言復招物議且不堪於敷奏難從事於
殿庭旣經該科叅劾前來皆應議處合候

命下將楊賢照年老例致仕王汝言照不及例
調外任員缺另行推補等因隆慶六年閏
二月十四日題十六日奉

聖旨是楊賢着致仕王汝言降一級調外任

覆都給事中梁問孟追論貴州事疏

該兵部咨開兵科都給事中梁問孟等題

稱叛賊者念自三十七年父子稱王以後

撫按未見奏報乞要查覈到任管事年月

分別處治議兵部議行本部將該省巡撫

自嘉靖三十七年以後隆慶五年以前管

事職名通行查出分別奏請恭候

宸斷仍將究處過事由著爲定以通行申飭一
節除高翀鮑道明趙鈺吳維嶽吳嶽已經
病故康朗嚴清未曾到任陳洪濛已經致
仕俱難復究外爲照巡撫受封疆之寄地
方有警便當據其始發卽行剪除扼其方
張務在撲滅豈宜坐視以致滋蔓叛賊者
念父子濟惡僭稱王號流毒四境三十餘
年殊非區區草竊者比先任巡撫都御史
趙錦杜拯王諍職專開府坐鎮一方旣不
能設計剿除又不行奏

聞征討玩寇殃民所應重究雖貴州邊徼之地
較之腹裏不同諸酋自相讐殺亦其常事
未宜過激致生他變然至于劫殺我民僭
擬王號則

國有明法在所必誅於此而隱避旁觀置之
不問則有不能辭其罪者但年久亡去者
多今止存其一二難以盡論旣經該科追
論前來相應酌擬合候

命下將趙錦杜拯姑降俸級王諍俟調用時另處仍移咨都察院轉行各該撫按衙門以後地方有事若隱避不處雖日後肆發有人蕩除仍追查以前當事遺患之臣重加究黜永爲定例庶罪有所歸而自貽之憾不以旣去而得免人知所畏而方萌之孽不待訖逞而後圖禍本永消地方可靖隆慶六年四月初三日題初五日奉

聖旨是趙錦杜拯各降俸一級欽此

覆吏科論巡撫曹三場疏

該吏科都給事中雒遵等題論巡撫雲南右副都御史曹三場假捏月日朦朧預奏考滿乞行速爲罷黜再乞查復給由

舊制酌從時宜以憑黜陟等因奉

聖旨吏部知道欽此欽遵爲照官員歷俸三十六箇月完足方得考滿此定例也近因在差官員多有假捏月日以虛作實朦朧考滿者本部查非法紀於隆慶五年六月內

題奉

欽依嚴行條例已經通行各省去後今曹三暘
乃敢故違前例據稱本年三月初六日方
終任滿却於二月二十一日即行具奏計
閏實少四十五日在本官則以發本之日
雖未及期比及到京當已滿足固也然安
能必四十五日之內絕無他故乎萬一有
之即少一日不得謂之實歷三年既無三
年實歷而乃朦朧考滿濫叨

朝廷

封廕固非法也原其設心不過急求
恩典是以敢犯

明例雖計期扣筭比之假捏月日稍有不同而
以虛作實自難辭其欺詐之罪既經該科
叅劾前來相應議處合候

命下將曹三暘照例罷職員缺會官推補其該
科所陳考滿規制亦宜併議緣事體重大
容臣等叅查

舊制斟酌時宜另行奏

請定奪隆慶六年四月初三日題初五日奉
聖旨是曹三陽著致仕欽此

覆御史姚光泮論府丞丘有崑等疏

該巡按直隸監察御史姚光泮題叅應天府府丞丘有崑乘機納賄乞要罷斥原任翰林院編修今閒任曹大章原任苑馬寺卿今閒任韓子允朋計誑騙乞要提問追贓各等因奉

聖旨吏部知道欽此欽遵爲照丘有崑貪贓賣法穢跡彰聞卽姚光泮所論已有三千五六百之多罪何止於罷官曹大章韓子允同謀挾騙平民財物萬有餘金情罪重大法尤難於輕貸旣該巡按御史姚光泮叅劾前來相應議處合候

命下將丘有崑先行革職爲民并曹大章韓子允俱移咨南京法司提問明白奉

請發落遺下府丞員缺另行銓補隆慶六年四

月初四日題初六日奉

聖旨是丘有崑着革職爲民并曹大章韓子允
南京法司提問具奏

掌銓題稿卷之二十四終

